

Renchi di Möbius

Bo ta involví di un manera òf otro den un fundashon di gobièrnu? Sigui lesa trankil numa e ora ei. Si no t'asina, mi ta konsehá bo pa bai hasi algu mas útil. Fundashonnan no tin akshonista. Nan no tin miembro tampoko. Hurídikamente mirá, fundashonnan ta bastionnan será. Ta direktiva ta esun ku ta dikta. Fundashonnan di gobièrnu no ta eksistí, maske Pais tin biaha ta pensa ku sí. Den un 'fundashon di gobièrnu' tambe, ta direktiva ta dikta. Kosnan ta otro den kaso di N.V.nan di gobièrnu. Einan ta Pais ta akshonista.

Sí t'asina ku Pais por tin un relashon spesial ku un fundashon. Tin biaha esaki ta a base di un kòntrakt di maneho, otro biaha a base di lei. Bon mirá, kosnan ta mihó den kaso di un kòntrakt di maneho. Tin ekivalensia di tur dos banda. E fundashon ta duna servisio na Pais òf komunidad i ta risibí rekompensa pa esaki a base di un akuerdo. Si Pais no paga e fundashon, esaki lo stòp ku dunamentu di e servisionan. Di niun otro manera Pais no por influensιά e maneho i manera ku kosnan ta kana, ku no ta dor di determiná contenido di e kòntrakt. Komo fundashon bo por bisa si òf nò na esaki.

Si bo ta risibí supsidio komo fundashon, ta hinter un otro asunto e ora ei. Supsidio ta krea ekivalensia. Komo fundashon bo ta dependiente di supsidio. No ta eksistí algu manera derechi riba supsidio. Pa mayoria fundashon na Kòrsou te hasta no tin garantia riba supsidio pa e aña binidero. Esaki ta hopi fèrfelu pa e direktiva for di perspektiva di kontinuidat. Hopi biaha bo mester sera kompromisonan ku ta kubri diferente aña. Kosnan ta bira mas fèrfelu ainda si kalifiká un fundashon komo 'fundashon di gobièrnu', segun e Ordenansa Nashonal di Corporate Governance. Esaki ta e kaso ora ku Pais, statutariamente tin e derechi pa apuntá un òf mas miembro di direktiva òf miembro di e hunta di supervishon òf tambe si Pais tin e derechi pa adaptá e statutonnan. Den un kaso asina, sierto akto hurídiko di Pais relashoná ku e fundashon ei ta sometí na konseho previo di e Konsehero di Corporate Governance. Si por ehèmpel, di parti di Pais, mester postulá e atministradó òf supervisor, e ora ei e Konsehero mester duna konseho na gobièrnu promé. Meskos ta konta pa un modifikashon di e statutonnan, aloménos, si tin pará den e statutonnan ku Pais, pa modifikashon di esakinan, mester duna outorisashon previo. Anto awor e kos ta bai sinta. Pais (i tambe e Konsehero di Corporate Governance) lo tin gana pa tipo di fundashonnan di gobièrnu asina, introdusí e asina yamá modelo di statuto. Direktiva por tuma un desishon riba esaki. Den kaso ku Pais tin e derechi pa (solamente) nombra un miembro di direktiva den un fundashon, e ora ei pa un kambio di statuto asina, ta dependé di sobrá miembro di direktiva ku no a keda nombrá pa Pais, si nan ta dispuesto pa hasi esaki. Si nan pensa bon, e chèns ta grandi ku nan lo no tin e disponibilitat ei. Di pursi, den e modelo di statuto tin pará ku Pais ta nombra *tur* miembro di direktiva.

Ke men, despues di e kambio di statuto, Pais e ora ei tin e derechi eksklusivo den kaso di vakatura. Duru den gara! Esaki ademas no ta nifiká ku Pais e ora ei tin poder den e fundashon manera e tin poder den un kompania anónimo kaminda e tin tur e akshonnan. Maske ku ta Pais a nombra tur e miembronan di direktiva den un fundashon, nan ta tuma nan desishonnan a base di e statutonnan i sin

ku nan mester tuma ningun instrukshon den esaki di esun ku a nombra nan. Esaki ta nifiká e ora ei ku nan di forma independiente por bolbe kambia e statutonan di tal manera ku Pais lo bolbe pèrdè e derechi di nombra tur miembro di direktiva? Lástimamente ku nò. E ta un tráfiiko den un direkshon so. Pasó den e mesun modelo di statuto ei tin pará ku kada kambio di statuto ta rekerí outorisashon previo di Pais. Ke men lo bo no skapa di dje nunca di bo bida.



[Frank Kunneman](#)

VanEps Kunneman VanDoorne
Attorney at law | Partner

T +5999 461 3400 ext. 254

E kunneman@vandoorne.com
